



國朝寶鑑

ナ 6
4511
16



門 9 字 6
號 4511
卷 28-16

國朝寶鑑卷之四十九

肅宗朝九

辛未十七年春正月 上特下旨別諭于三南
道臣曰否德忝位遭罹屯艱夙宵憂懼莫敢
或遑對玉食而思稼穡之艱難御輕暖而念
紡績之辛苦耿耿一念何嘗不在於安民保
邦而祗緣仁不足以澤物明不足以燭理發
政圖事動輒乖戾徒有愛民之心而未有愛
民之實自速皇天之憚怒以致灾荒之孔棘
水旱風霜害爾禾穀使我三南根本之地億

萬無辜之民飢困至此壯者散而之四弱者
填于溝壑噫嘻正當載陽品物咸囿於雨露
而哀我赤子亦獨何辜生此不辰鄙屋無奠
居之樂中谷有仇離之歎靡有孑遺之慘將
復見於今日心焉若割尚寐無吡也嗚呼惟
天作之君作之師者蓋所以為民也予既不
能制民之產使無恒心又不能量入為出積
儲曩恥縱欲發倉而殆同無麩之不能雖已
蠲役而未見實惠之下究此罔非寡躬之失
夫復何言然念民之於君猶子之於父母父

母雖貧不能養為其子者豈有棄父母而去
者乎予方與廟堂諸臣日夜謀度以求濟活
之策且就三南被災中尤甚邑田稅大同特
令停捧餘外擾民之事一切停罷以示若保
之意嗟爾赤子念 祖宗之深仁厚澤體寡
昧之至誠惻怛忍飢忍寒各保爾家無或流
散無或竊盜而亦宜勸諭隣里蓋藏者必須
升合相資無為獨生是所望於爾等者也吁
一紙悃幅敷告丁寧言非騰口實出由衷咨
爾方伯諒予此心明白曉諭而前頭設賑亦

且不遠為今日列邑守令者若以民飢與同
飢民死與同死為心至誠救活則庶幾民無
捐瘠而賑政有著實之效矣並宜知悉另加
申飭至於湖南封進朔膳亦令該曹依嶺南
例限今秋稟旨量減○引見大臣備局諸臣
領議政權大運以都下饑困特甚請出戶曹
買置穀萬餘石從輕發賣而仍請自 上特
下備忘以行之 上遂下教縷縷備示軫念
都民之意令該曹舉行大運曰新折受處既
有還給之教矣伊川有訓鍊都監屯田一處

及黃腸所封三處並入於折受移屬於義宮
楊根邑內亦入其中請並命還給 上可之
大運曰京外民生值此大無舉皆填壑而獨
於祿俸不為減省實未安矣筵臣多以為言
上曰我國祿俸元來薄略實非忠信重祿之
義予意則不欲減省而諸臣所達如此不得
已從之○二月備忘記曰各司開坐日長則
卯仕胥罷日短則辰仕申罷自是法典而比
來百隸怠慢成習偃卧其家日晏赴衙雖聞
漫公事必致夜深後入啓事之寒心久矣去

年秋間啓下禁府之上言今始覆奏已極稽
緩而亦不趨早開坐未免深夜入啓宜有警
責之道禁府當該堂郎並從重推考自今以
後依前下教事係大段變通者外循例公事
必於三日內覆啓一依大典開坐事更加申
飭○上詣貞陵展謁後行酌獻禮還至沙河
里登壇閱武仍命牽來太僕馬三匹分賜三
大將 上引宋太祖歷謁武成王故事將於
回鑾之路駐駕武安王廟入瞻遺像令諸大
臣講定節目左議政睦來善以為宜倣周王

式商容之間行式禮右議政閔黯則以為不
宜拜且不宜式當舉手揖 上從黯議三司
請對以無國朝前例請停歷入之舉 上曰
武安王萬古忠義素所嘉歎既過其門油然
與感入瞻何妨不從○上下備忘記曰噫武
安王之忠義實千古所罕予嘗題一絕句
下于關王之圖以寓尋常歎慕之意而每於
東道陵幸往來之時一欲入瞻肅肅之遺像
矣今茲歷入實出於曠世相感之意而亦所
以激勵武士本非取快一時之遊觀而已咨

爾諸將須體此意益勵忠義捍衛王室是所
望於爾等者也且東南關王廟宇破傷之處
其令該曹斯速消吉着實修改遣官致祭而
祭文中備悉予遐想復歎之意○三月上
下備忘曰頃日瞻觀武安王遺像髮髯顯有
剪斷之形事甚未安此等處一新修補仍念
祖宗朝建祠崇奉實出景仰忠節之盛意而
不禁雜人致有此事其他傷污處亦多使肅
清之廟宇作一行人褻玩之所若不別樣禁
斷則今日修改明日傷破殊無致敬之本意

今後若又有如此之患見發於摘奸時則當
該守直官從重論罪之意各別嚴飭○上親
臨慕華館閱武下備忘記曰騎射乃武士之
長技也自 孝廟朝罷革射立騎射之法蓋
非偶然而近來武士不體朝家勸獎之意年
未甚老而資秩稍高則視若羞恥事自稱衰
耄公然拋棄昨閱除初試舉案則騎葛不參
者至於一百三十人之多事甚可駭雖難盡
繩以軍法並令退射事分付試所○夏六月
引見大臣備局諸宰領議政權大運以江都

築城事陳白曰訓練都監之軍乃輦下親兵固不可赴役於遠外以御營軍五百名除番赴役似便但諸議多以聚軍外地為慮矣上曰此則過慮也頃年墩臺之役雖有意外之事何可每疑其如是耶右議政閔黯曰或以募軍為便而應募者近萬若無統領事必不集莫如專用節制之軍而海邊軍卒頗習築土之役黃海道禁衛軍當番者除番赴役而令去軍裝則何慮之有上曰諸臣雖各有所見而以御營軍赴役如大臣言可也右

叅贊柳命天以意外事變為慮黯曰頃年惡言亦出於僧軍僧軍是募軍之類若以此為慮則募軍不可役矣上曰人君之心貴於豁達御衆之道務在寬弘昔宋太祖曰有天命者任自為之若事事出慮節節生疑則非人君舍弘廣大之度此役但當用有節制之兵何可豫疑於不當疑之地乎設有意外之患非所逆料也○秋七月慶尚道觀察使閔昌道辭朝上引見諭之曰諸道方伯孰非重任而嶺南為最前歲凶歉振古所無安集

臣等謹將金卷之四十一
流散為急先務其往懋哉昌道曰文官之出
入兩司者蓋豈出宰而率多武蔭弊瘼滋甚
殿最雖宜盡心自朝家亦不可不擇送矣
上曰治績不係文南武固宜擇送而考其治
不治惟在殿最之嚴明矣且嶺南素稱人才
府庫而士習渝薄漸不如古鄉須廉問必擇
可合調用者以聞○閏月 上手題一律下
政院曰從古禍人國莫如黨比酷東西纜標
榜老少轉橫圻公道時淪喪私心日係着須
知啟鑑邇終始竭忠力仍下教曰噫朋黨之

禍尚忍言哉曩時羣壬柄權老少分裂公道
日喪私意日勝末流之害終至於義理晦塞
朋黨之禍尚忍言哉目今化理維新朝著清
明一乃心力夾輔王室此誠可有為之機也
雖然或勤或怠不繼初心固人情之所難免
則諄諄勅勵不害為加勉之道故不揆短拙
親題一律以寓予志咨爾大小臣僚倘或體
此至意痛去己私終始保合則茲豈非國家
無疆之福歟言出肝膈宜各勉旃○引見大
臣備局諸宰 上因大臣言三南賑穀及租

臣等竊金卷之四十一
稅特命蠲減即命承旨就榻前書下備忘曰
哀我民生纔經大侵萬死一生譬如大病之
人氣血未復也此時懷保之策在所當先今
若諉以稍稔許多賑穀一時還徵則此正古
人所謂樂歲終身苦凶年不免於死亡者也
是豈王政所可忍乎其令該曹該廳分輕重
稟旨變通上年停捧之田稅全減大同則量
減以示朝家德意○上親製千字序文下春
坊春坊請刊出并卷待東宮開筵以此文進
講許之其文曰予惟千字一書即梁朝周興

嗣之所撰也昔武帝教諸王書令殷鐵石于
鍾王書中搨一千字不重者每字片紙雜碎
無序今與嗣韻之與嗣編綴於一日之內鬚
髮為之盡白可見用力之勤而之所以排比
者亦可謂精且切矣仍又思惟春宮方講習
是書而性既聰朗心智日長加意學問政在
匪遠每當誦讀之際不惟只識字訓而已必
須反覆紬繹觸類而長之如讀孝當竭力之
句則思文王之日三朝而必也愉愉怡怡洞
洞屬屬讀尺璧寸陰之句則如舜投珠璧禹

惜寸陰而必也賤實貴德學如不及讀刻念作聖之句則念聖狂之判在乎理欲而必也過爾人欲擴爾天理讀知過必改之句則體義易之風雷益而必也遷善如風之速改過如雷之猛讀務茲稼穡之句則知盤中粒米皆出辛苦而必也尚儉節用為國惜福日夕孜孜體驗于身則未必不為開敷成就之一助云爾○御書講知經筵沈梓曰侍從臣有老母被賜賚者將會其老母而設宴以侈上恩甚盛舉也 宣廟朝西平府院君韓浚

謙故叅判洪履祥等及 仁廟朝新豐府院君張維故判書李植等為老母設宴時有宣醞賜樂賜物之恩故相臣盧守慎母年過八十設壽席 宣廟至今朝臣赴宴而賜樂賜物臣亦竊附故事敢奏 上謂事甚稀貴命依 宣廟朝故事而行之○上下備忘曰孟子云仁政必自經界始正經界者王政之先務也我國經界不正賦役仍以不均諸道量田縱不能一時並舉漸修此法則不有愈於一任其不均而置之相忘耶其令廟堂商確

稟處後因大臣言令待明年行之○八月
上特遣中官于江都慰諭築城士卒賜香醞
六十瓶其他賜賚甚厚仍令江華留守宣諭
曰噫可信可恤者非士卒乎平居無事環衛
王室金革有警執戈前驅其休其戚與國共
之可信可恤者固非士卒乎今茲江都版築
之舉實出於迨天未雨桑土綢繆之策而工
役浩穰若非軍門之健兒不足以竭力趨赴
速了大役是予之所以依信爾等有此徵召
者也然念爾等身操版鋪勞苦實多予之矜

念矣特宋帝之軫恤西征將士而已哉茲遣
中官以諭予意仍加錫賚以慰其勞而又以
御酒六十瓶特賜爾等縱不能徧及諸軍蓋
亦投醪河同流飲之義也宜各知悉盡心王
事事卿其待中使下去頒賞之時明白宣布
而軍卒中如有不遵將令作挈村間者繩以
軍令斷不饒貸事亦宜曉諭○上詣大學謁
文廟仍策士是日曉頭 上御下輦臺先下
備忘記令揭示戒諭多士曰噫設庠序學校
以養四方之士者蓋為其講廟正學擇善修

身本乎人倫明乎物理者也豈徒作文干祿而已哉昔顯孫師學干祿子曰多聞闕疑慎言其餘則寡尤多見闕殆慎行其餘則寡悔誠能學之博擇之精守之約則祿不干而自至矣此豈非萬世之格言耶竊觀比來世降俗末士習不古經明行修曉達治體者少而尚文辭遺經業趨祿利者滔滔有之斯豈惟我祖宗興學作人之本意哉予於此未嘗不為世道發一慨也仍記昔安定胡公嘗為蘇湖教授孜孜雅飭其弟子之辭氣異乎常

人矧伊濟濟章甫密邇尺五上下情志藹然流通誘掖激勵寧不在茲咨爾多士敬聽予訓服膺勿失漸摩成就則其為國家斯文之幸可勝言哉亶出心腹宜各猛省○九月上渡露梁津見成三問等六臣墓在路傍感其節義特命遣官賜祭仍命遣近侍致祭于魯山大君墓判府事金德遠以為六臣墓雖有古來流傳之說而猶無明白可據之證朴堯年後孫故郡守崇古嘗為之豎石表識而不敢定謂祖墳云上遂令祭于其祠又因

禮官言聞未復官教曰六臣與明朝方孝孺何異即命復官且賜祠額旋因諸臣爭執始令姑寢前命只行魯山墓致祭○下教曰予以不穀叨承丕基顧諟明命恐隆付托夙夜寅畏因或怠忽祗緣才疎德薄施措乖舛國勢日趨委靡民生日益困窮雖微咎徵已多虞端不料雷電之變遽發於閉歲之月號號燁燁殆同盛夏不知何樣禍機伏在冥冥之中而仁天之降灾微予若是其諄諄耶乾象玄遠縱未易窺測灾不虛生必有所召靜思

一啟繇亶在否德及躬省愆一倍兢惕因知攸措也承旨代予草教宜自政府廣求讜直之言以匡小子之不逮咨爾大小臣僚深體前日戒諭之旨割斷私意恢張公道且念昔人僅容旋馬之義亟罷土木務盡節約惟以愛君如父憂國如家為己任同心戮力夾輔王室少答天譴弘濟時艱○冬十一月 上下備忘記曰予觀國朝故事 太宗二年命畫前代可法之事于壁上 成宗元年命擇可法可戒者圖畫作屏仍令詞臣詩以詠之是

豈取玩於繪事哉今欲取前代善可為法惡
可為戒者各八事以其類描作二屏屏各八
疊張之座隅以資省察其令玉堂董成之主
文之臣各以其事製律詩并諸屏幅以進善
者帝堯之任賢圖治帝舜之作歌勅命夏禹
之揭器求言商湯之桑林禱雨中宗之德滅
祥桑周文之澤及枯骨武王之丹書受戒宣
王之感諫勤政惡者夏太康之遊畋失位漢
成帝之市里微行哀帝之嬖佞戮賢靈帝之
西邸鬻爵晉武帝之羊車遊宴唐玄宗之歛

財侈費懿宗之怒流諫臣宋徽宗之任用奸
賊凡十六事也○上特下備忘記令布告中
外有曰夏禹之世功成治定黎民皞皞而猶
以不若唐虞痛自刻責至於下車泣辜至誠
惻怛之意藹然乎辭表千載之下有足感動
者嗚呼今日國步之屯艱維其棘矣氓俗之
乖敗亦孔棘矣愛親敬兄忠君弟長漫不知
為何事悖倫亂常日加月增耳聞目見罔非
驚心不圖湖西又有父殺子之變噫父子慈
愛天賦之常性無貴賤同得彼雖蚩蚩忍為

此至不忍之事豈無所以哉魯論云道之以
政齊之以刑民免而無恥道之以德齊之以
禮有恥且格旨哉言乎藐予小子無才無德
臨小民今過一紀而曾不知以德禮先之一
之使民日遷善但欲以法制刑罰苟冀其遠
罪是恃其末而不探其本也絲是觀之吾民
之不自愛而輕犯法實由於導率之乖方寡
昧之痛心奚但大禹之泣辜而已哉咨爾大
小民庶體予反覆誥諭之至意感發本然之
善心盡其職分之當然一日二日各自激勵

則於變時雍之化豈特專羨於唐虞○夜
上宣醞玉堂製下七言詩曰雪風如劍折綿
寒金闕沈沈夜已闌忽憶登瀛傳御饌耿耿
醉飽侈恩權且以小序引之曰帷幄之臣職
親地禁香舍雞舌講備顧問古人至比於登
瀛洲可謂一時之極選而自 祖宗朝親之
信之恩禮之迥別不啻若家人父子者夫豈
偶然哉卿等俱以文雅昵侍講筵至誠啓沃
思盡職責予甚嘉尚曰篤不忘也即今寒事
漸緊更鼓漸遲對天厨之珍羞而念禁直之

寂寥特賜御饌法醞兼題一絕以寓予意焉
蓋寵之也玉堂八直官進箋以謝廣韻以進
○十二月特命該曹復成三問等六人爵遣
官致祭賜祠額愍節下備忘記曰夫有國之
所先務者固莫大乎崇節獎義人臣之所最
難者亦莫過乎仗節死義此古昔帝王之所
以必重節義之士而輒加褒錄者也念彼六
臣豈不知天命人心之不可逆而乃心所事
死而無悔是誠人所難能而其忠節凜凜於
數百年之下可與皇明方孝孺景清輩同日

語矣矧適有事先陵輦過墓傍於予心尤有
所感者噫為親者諱詐昧斯義而第予之所
欲褒者不惟祇為其節義當世亂臣後世忠
臣之教聖意有在則今日此舉實所以紹
世祖之遺意光世祖之盛德也寧有未安
之事乎成三問等六人其令該曹特為復官
致祭以樹百代之風聲

壬申十八年春正月 上特下備忘于百官起
居班曰陰盡北陸春迎東郊天地和同萬品
昭蘇體乾元之至仁新一代之庶政至誠無

息此正其機也咨爾大小臣僚體此誥諭痛
革舊染與歲俱新是予之切望者也且布德
和令教飭農事王政之所先務宜令諸道方
伯申飭列邑廣詢元元疾苦條列以聞而仍
令修治其封疆審端其經術皆自力田各盡
人事以示朝家恤民務本之意○副提學權
璿請對入侍白 上曰異國珍物本非人君
所當玩外間有銀鼠皮作御裘之說臣竊慨
然晉武帝唐玄宗不過凡主而焚雉頭裘錦
繡帳史氏義之以 殿下之明聖豈不若兩

君之所為乎 上嘉約之即命下銀鼠裘二
領於政院使焚之仍降備忘曰夫焚者不過
一畜物而在昔姬周西旅貢獒君奭作書倦
倦告戒武王者何哉恐或其玩物喪志終累
大德也今日筵中副提學權璿以却異物昭
儉德之意縷縷陳達辭意激切款款忠愛古
今一般予既已嘉其誠而可其奏矣今以御
裘及未裁縫者并下本院其令尚方悉焚之
以示予翕受敷施之實○引見下直監司兵
使面諭而遣之仍令入侍承旨書備忘以下

曰國俗澆薄民志不固一聞浮言輒至波蕩
京中士夫胥動訛言孳家下鄉者繼屬於道
以致村閭騷然云無識愚氓不必深罪身為
士夫稍知分義者所當曉諭鎮定之不暇而
動於不當動之說先思各自保身之心脫有
金革之警尚何望其為王前驅其令京兆申
飭各部表表士夫之驚動下鄉者精查以聞
後因大臣言姑寢查問之舉令加警飭○上
親製大明集禮序文下政院使之一體繡梓
序文曰夫天下之至理寓之於禮禮也者日

用事物之所當然而體用備具小大由之此
所謂天理之節文人事之儀則而不可斯須
去身者也予於萬幾之暇繙閱方冊得集禮
一部書迺大明 太祖高皇帝之所撰定也
編帙摠四十卷而上自祀天祭地宗廟社稷
之禮以至朝會冠昏朝貢親征吊賻之儀莫
不昭載纖悉該博夫以台小子之昧於禮學
者尚且一展瞭然多所裨益然後知是書實
禮家之指南而與我朝五禮儀相表裏為萬
世不刊之典也惜乎其御府所藏頗有脫落

不克成帙爰命王署蒐取禮部俾補其缺又
允可儒臣李允修之奏精寫一通詳加校讎
仍付二南為之剖劂廣布臣隣而壽其傳以
申予有庸五禮之意庶乎有補於治化之萬
一云○三月復故副揔管成勝爵勝三問之
父也六臣之死勝亦與之 上既復六臣官
爵洪州儒生等上疏曰勝之丘墓在本州魯
隱洞距舊宅數里而近三問妻亦葬其側而
勝之父于家產盡沒入官本道連山縣有成
家田民方屬勲府而聞其臧獲至今招魂設

奠歲一次六臣既復官則勝不宜異同且請
還給其田民俾禁遺墓之樵牧 上令該府
議處覆奏以成家田土今當出給而奴婢則
文書無可據本府奴婢在連山縣者特為劃
給為宜 上許之○夏五月旱甚遣大臣禱
雨不驗於是下備忘記曰再次祈雨之後視
天夢夢尚靳霈澤言念民事若恫在已顧予
誠意淺薄不足以感格天心而民事之渴悶
至此躬詣南郊代犧祈禱之舉不容少緩其
令禮官不卜日舉行仍令大提學製進親祭

文具陳予罪已之意且命有司申飭諸司及侍衛將卒於壇所舉動時毋得踐蹂禾穀以傷為民禱雨之意○秋八月夜對承旨沈撥自湖臬適歸極陳沿邊水災上惻然下教曰今年水災八路同然京甸湖西海西等三道既許給災且減滄死人身布矣抑念諸道民人或有家舍覆沒田疇沈壓赤身奔避蕩盡家產之類雖幸免死顛顛流離無以保存其為矜惻與死者何異其令諸道道臣別為抄出以聞一體蠲役廣示朝家恤民之德意

○九月 上自製二首詩以御筆鏤板以下曰一即會題關王之圖者一即歷八東關王廟有感而作者也其令分揭于東南關王廟以表予敬慕之意詩曰生平我愛壽亭公節義精忠萬古崇志勞臣復身先逝烈士千秋涕滿曾有事春郊歷古廟入瞻遺像肅然清今辰致敬思逾切願佑吾東萬世寧○冬十月 上命拔後園舊種棕櫚木送還民間本主 上嘗求棕櫚木聞前安岳郡守洪萬恢家有之使按隸求之蓋以萬恢即永安尉洪

柱元季子為國戚故也萬忤下庭伏曰頂踵
國恩髮膚不敢惜况卉木乎但雖名國戚屬
踈為外臣以卉木進有罪不敢也臣亦不敢
復留之即拔去之掖隸白其狀 上稱善遂
有是命○十一月 上以畿甸及湖西海西
被災為尤甚特下備忘諭三道監司曰后非
民罔使民非后罔事可愛非民可恤非民予
以涼德為民父母莫敢違寧一人饑猶吾之
饑一人寒猶吾之寒相與謀度于廣廈之上
者一則民事二則民事而惠澤未究窮困日

甚厥故安在正坐乎不能以實心行實政也
政令如此則視聽自我之天安得不赫然威
怒而降饑饉也哉今歲災荒亦孔之棘矣水
旱風霜卒瘁稼穡冬序未盡室如懸磬扶老
携幼散而之四村落殆空景象蕭然則來春
道殣之慘不言可想嗚呼書不云乎暑雨祁
寒小民亦惟曰怨咨思艱圖易之責亶在一
人而緣予不辟使我無罪無辜之赤子替罹
荼毒興言及此不覺哽咽凡係蠲役調賑之
政或已舉行或方講究靡不用極咨爾方伯

國朝寶鑑卷之四十九
體予至意申明列邑勞之來之撫摩是先苟
涉救民何憚條奏且前頭設賑之時必使守
令如治家事勿委監色身自擔當至誠濟活
得免捐瘠是予之日夜冀望者並宜知悉着
念奉行○夜風雪甚 上下教曰燠室擁裘
尚覺凜冽念彼貧殘軍卒何以堪之闕內入
直之士自內賜酒食宮城外衛卒其令內資
寺饋酒司宰監賜肴以示予軫恤之意○十
二月 上特下旨諭八道監司曰重莫重於
人命死不可以復生是以雖以人主之挾雷

霆之威操生殺之柄者凡於刑人殺人不敢
循喜怒之私其生其死一付公議今夫殺人
偽印必誅之罪難償之惡而猶尚會集卿宰
再三詳覈引律擬罪求生必死情罪俱無可
恕而諸大夫皆曰可殺然後殺之者豈非人
命至重不如是或恐有抱冤枉死以傷和氣
也歟由此觀之國家之所以重人命者為如
何而奈之何大小州縣之官罔念欽恤之道
決罰多不如法或因纖芥之嫌或觸一時之
怒別用大杖恣意撲殺輕視人命不啻草芥

事之寒心孰甚於此昨觀歲抄諸道守令之
犯此條而獲譴者亦非一二故如此之類一
不牽復俾知有所懲戒而不可無別樣申飭
之道咨爾方伯須以此意曉諭列邑各自惕
念期革弊習而凡為字收者不體明教違法
濫刑猶夫前日而隨事現發則當繩以重律
斷不饒貸卿其著實舉行○上覽湖南殺獄
按問多踈漏乃下教曰殺獄之最緊最重者
莫如檢覆一有不明死生係焉可不詳審乎
間有外方守令厭其親審付之下吏因緣用

奸任意增減獄事遷就至有數十年不決而
瘦死獄中者此怨冤之所由興也予甚惻然
其令該曹知委諸道自今以往該官必親自
開檢一從無冤錄毋或有難明未盡之患

癸酉十九年春二月 上謁穆陵仍歷拜健元
陵徽陵崇陵顯陵還至茵匠里峴見民人塗
集 上駐馬欲招集慰諭之諸大臣請到晝
停所行之 上行至晝停所御帳殿招入父
老以手札慰諭曰噫自予否德忝位以來水
旱風霜逐歲為灾卒瘁稼穡使我赤子曾未

有一日奠居之樂至若去歲之灾荒八路同
然近古所罕而畿甸根本之地比他最酷節
屆春和萬物咸囿於雨露而哀我民斯獨阡
於飢困究厥所以職由予之不能盡君師之
責而然也若恫在躬王食何安凡係蠲役賙
賑之政業已講究靡不用極而今當園陵禮
畢鑿輿載回之辰顧瞻田野如傷惻怛之懷
自不覺其益切于中為之停車特召爾等用
敷心腹之辭仍命有司畿內各邑今春收米
及田稅米太使之待秋退捧其中田稅已納

之邑特以該廳穀物移轉代給至於揚州陵
寢多在於一邑廣州今番行幸時亦多有奔
走之勞理宜優恤故揚州丁卯條還上特為
蕩減廣州田稅米太亦令該廳稟旨變通以
示別樣軫恤之意嗟爾士民體予至誠拯救
之意毋或流散各保其家服田力穡庶幾有
秋是予之所望於爾等者也○揚州儒生李
齊華等上疏請永減本州田稅收米兩役之
一以紓民力命廟堂稟處廟堂以為惟正之
供不可以民人之請輕議永減請置之 上

判曰國之為政愛民為大矧今謁陵歸路為
之駐駕招集父老降手札而慰諭舉一邑而
施惠實是非常之舉 列聖九陵在於揚州
徭役之重民力之困誠有所難處者今此齊
民同聲哀籲於香案咫尺之前為民父母惻
隱之心自不覺油然而生靜坐深宮中夜耿
耿噫予既訪問其情願矣求之前史亦有行
之者揚州一邑收米特為永減以示軫恤之
意○白虹貫日 上特下求言之教曰不穀
忝位十九年于茲矣恐墜付畀夙夜戰兢一

政一令未嘗不十分審慎而祗緣施措之間
動輒乖謬不合於時宜人事之失若此故仁
愛之天赫然震怒荐降咎徵固已不遑寧處
矣陰虹貫陽之變又見於民憂孔棘之日未
知何樣禍機伏於冥冥而上天之示警若是
丁寧歟董仲舒有言曰國家將有失道之敗
天先出災異以譴告之不知自省又出恠異
以警愍之噫嘻災不虛生必有所召今茲致
異實由涼德反躬省愆一倍危懍承旨代予
草教宜自政府廣求直言以匡小子之不逮

言雖不中予不之罪亦豈無責勵羣工交相
儆戒之道乎洛爾大小臣僚體予寅畏之意
痛祛一己之私協心共濟奉法率職少荅天
譴○三月教曰今慶德宮承暉殿墻垣修改
時有人枯骨不啻狼藉必是舊遠埋葬之地
聞來不覺惻然骨雖朽矣予為民主其無顧
恤之典乎茲用自製祭文以下其令該曹各
別歛瘞仍為賜祭以表予意其祭文曰營殿
歲久而圯而毀穀朝是差載修載理仍舊恢
拓承暉之北土役方張忍見枯骨嗟爾子魂

幾閱年時無主無依不其餒而我為民主惻
然何其爰命有司歛之瘞之賜以薄具用表
予意感應不爽庶幾歆止○教曰昔宋臣李
沆對真宗之問曰宰相公事則公言之何用
密啓人臣有密啓者非讒則佞此誠萬古格
言也日昨臺臣以捕盜大將拿問事有所論
啓矣即者內官崔尚仰為捕將伸辨事陳達
而以翰苑廳直之捕捉有若大段不測之變
潛伏將發者然聽其語意極涉綢繆似有來
脉故嚴問於尚仰則果稱李德屹因大將之

言欲達天聽故陳啓云今此廳直之捕捉曲折所犯虛實全未聞知而此路一開日後曲逕密啓有不可勝言而其流之害將至於國不為國凡天下之事更歷事變則人情自有懲羹之心予於曩時密啓之害思之至今不覺慨惋藉令今日密啓十分公正恰當安知後之密啓者皆出於公且正乎不可不嚴加堤坊內官崔尚仰書題李德屹並邊遠定配○夏五月教曰自前朝講時刻差早閣門習講時例為明燭而今日時刻太晚承旨知悉

申飭○秋九月 上謁厚陵還到松都歷入穆清殿舊墟駐駕周覽御南門樓招父老立樓下命承旨慰諭仍命蠲滌本府舊糶穀未捧者又出債各衙門支勅而當責於民間者米豆租一千二百餘石銀錢九千兩大小米三千石綿布三十同鑰鐵千斤父老等陳本府獨當勅需而中江開市亦獨為責應之難及東伍納米之弊又請長湯松西面豐德德豐面金川故郡給屬本府 上以商議變通之意曉諭之○上下御製詩三首于政院命

國朝實錄卷之四十九
二一六
鏤板揭于松都南門樓其一去年重遇龍飛
歲今日欣瞻 聖祖宮矣但曩牆追慕倍緬
懷洪烈意無窮其二繁華氣象漠然衰千載
空餘麥秀基欲識古今興喪處須將伊訓玩
心思其三緩步登臨百尺樓我心非是喜觀
遊今辰闌闔咨詢地更願覃恩普八州○御
書講領府事金德遠曰畿甸賦役偏重松都
之民既已受惠而各邑獨未蒙惠似有酌處
之道 上曰此予意也遂下備忘記曰親臨
滿月臺之日軫恤畿民有所下詢仍就前日

所分給千石之中使之參酌加給矣今番行
幸道里頗遠與近陵之回鑿於一日之內者
有異動一道之民奔走供億而朝家之所施
者甚鮮不能遍及於予心終有所歉然不可
不別樣施惠其令廟堂商量稟處○冬十月
下教曰予聞欲保良民莫如先嚴賊法雖以
宋祖之寬厚立國獨於賊吏無所貸而我國
賊法最為不嚴前後守宰之犯賊就理者或
因赦倖逭或行查白脫無一人依法抵罪者
噫烹阿之鼎不設於庭而貪污之吏日事橫

歛民安得不困乎自今以後必須嚴立賊法毋有撓屈是亦保民之一道也其令王府稟旨舉行○以雷變下求言之教曰不穀忝位十有九年而才淺德薄施措乖舛自速皇天之倬怒水旱風霜之灾可怕可愕之變式月斯生殆無虛歲迺者大雷電之變遽發於純陰閉藏之節燁燁競競有甚盛夏詩人所謂不寧不令者不幸近之未知何緣禍機伏於冥冥而仁天之譴告若是丁寧耶冬雷之異曾或有之而豈如今日之驚心者乎此決非

尋常流行之灾苟究致此罔不由於人事之失於下則厥咎誰執實在否德若何以弭灾若何以扶顛一倍危懍罔知攸措也承旨代予草教宜自政府廣求切直之言上自寡躬闕遺下至生民利病極言竭論毋有所隱言雖不中予不之罪也噫咨爾大小臣僚自乃祖乃父世篤忠貞盡瘁王室遭茲岁業之秋憂時愛君之忱想必有倍於平日須各體予至懷割斷已私精白一心奉法率職少荅天譴弘濟時艱承旨請以 上教直為頒示并

啓從之

甲戌二十年春正月 上親製朱文公小學序
文使之身于篇首其文曰小學何為而作也
古之人生甫八歲必受是書即三代教人之
法也自嬴秦坑焚以來經籍蕩殘存者幾希
此新安朱夫子之所以慨然乎世教之陵弛
輯舊聞而牖來學者也嗚呼是書也規模節
次燦然備具有內外之分有本末之序曰立
教曰明倫曰敬身茲三者內也本也次言稽
古所以撫往行而證之也曰嘉言曰善行茲

二者外也末也果能於斯三者沈潛反覆驗
之于身則二者不過推廣而實之而已譬如
網舉則目張根培則支達此正小子入道之
初程蒙養之聖功豈易言哉若夫敬身一篇
儘覺緊切蓋嘗論之敬者聖學之所以成始
成終徹上徹下而敬怠之間吉凶立判是以
武王踐祚之初師尚父之所以惓惓陳戒者
不越乎是學者誠有味于斯動靜必於敬造
次必於敬收吾出入之心立吾正大之本今
日下一功明日做一事於不知不覺之中靈

臺泰然表裏洞徹則進乎大學所謂修身齊
家治國平天下之道特一舉而措之矣其於
風化烏可少補云爾又親製時敏堂銘並序
曰時敏堂在儲承殿之南即世子胄筵之正
堂也堂以時敏名蓋取諸說命務時敏之義
焉誠以元良一國之本而學與不學治亂自
判苟不卑遜自下敏於學而如有所不及則
其何以日進緝熙之域哉遂以作銘用替盤
孟云爾銘曰瞻彼銅闈煥焉高堂曰時曰敏
訓義孔彰萬民攸繫一國元良學之勤否寔

判與亡粵惟 聖祖暨我 先王毓德春宮
罔有怠荒晝夜對玉食未遑誠意藹然相
得益章至矣盡矣邁古禹湯嗟汝體法不愆
不忘不役耳目不邇貂璫左右正士前後剛
方惟日孜孜無息自強厥德日修天祿日昌
匪我臆說聖言煌煌替古盤銘以資檢防
上又親製儆戒十箴以賜世子其法三朝箴
曰於乎百行非孝不立天經地義萬古不易
惟孝為大文王是則日三問寢洞洞屬屬其
親賢士箴曰紛華波蕩此心難持是以涵養

賢士必資前後宮僚左右賓師規違朝夕非法不為其勤講學箴曰嗟哉為學貴乎明理章句則未記誦餘事予訓汝體孜孜典墳勤怠之判治亂之分其謹幽獨箴曰幽獨得肆此心易放莫謂無知明明在上克念克敬必擴充之屋漏在邇須以為師其戒逸豫箴曰今來古往鴆毒宴安元聖懇懇七更其端念茲在茲所其無逸罔敢或懈兢兢業業其納忠言箴曰藥不瞑眩厥疾奚瘳勿謂逆心而必反求求之如何必有其道惟將太甲反覆

戒告其聖讒說箴曰讒人為禍何莫不然君臣際遇則尤怕焉聖讒遠佞詐有他途終始誠意務盡交孚其慎喜怒箴曰七情之中曰怒曰喜中之則難發之則易此病不除更做甚事中之如何必也當理其崇儉約箴曰夏邦興邦由奢由儉夷考前牒符契若驗大警厥心懋乃儉德為國惜福為民作式其明賞罰箴曰以勸以懲惟賞惟罰用是昔人迺慎迺必欲明二者宜戒偏着大公照臨人心可服○二月 上展謁獻陵以輦路新開役民

國朝實錄卷之四十九
三十一
不少命優恤之宣惠廳請廣州今年春六同
米每田一結各除二斗從之○上特命遣官
祭東郊衆塚是辛亥餓死人所瘞也曾於謁
寧陵時戒有司致酹至是又用其例○上駕
到廣津召本州諸父老詢其疾苦對曰舊年
糶糶逋欠甚多催科之患及於族隣上命
就最舊者量減之○夏四月下備忘記曰予
惟君之於臣猶父之於子何語可隱予畢所
蘊而仍及交修之道可乎嗚呼以曾母之賢
而不免投杼是以從古所難言者莫難於父

子之間所易動者莫易於父子之間也當初
建儲之日緯漢之疏猝起又有有疾始冊等
說噫嘻予於前代之史略已閱覽非不知伺
間恐動之手段每在乎此等處而非惟父子
之間人所易動予病恒在粗暴此病根痼發
必做錯向時處分之過當職由於此也嘗於
燕閒之際平心徐察而自道曰今日建儲乃
宗社之大計也今日臣子即世祿之舊臣也
安有為宗社定大計而為世祿之臣者如非
悖理之人敢有一毫他意於其間哉然則緯

漢之兇計無乃得售諸臣之本心無乃未暴耶以此常自悔恨實神明之所知也又竊觀已已以後彼輩之所為若非循私蔑公則率皆反道悖倫予於是決知其不足與共國事而國家處事亦豈容易姑且隱忍中夜慨惋者久矣今幸天誘其衷黯之與以完陰謀欺誣君父魚肉搢紳之計透露無餘當是之時若以顛倒為念不思所以廓揮乾斷則是知過而不改其得其失孰輕孰重乎噫嘻為今日懲前毖後之道將若之何正宜割斷私意

痛絕疑阻開心見誠以禮接下開不諱之門納忠讜之論言可用則翕受敷施言不可用則置之而已設有狂妄不中之言亦必優容不少摧折實是切急之務此寡昧之所以大自警于心而亦有以責勵臣隣庶冀其交修者也一紙播告言出肝膈咨爾羣工敬而聽之政院請布告中外從之○下備忘記曰邦運回泰中壺復位則民無二主古今通義其收張氏王后璽綬仍賜禧嬪舊爵以為世子不廢定省之禮又教曰前頭冊禮時例有告

廟頒教之禮而即今復壹位及廢置之事不可不先告此有事則告之義也令該曹舉行而告廟文中以莫察忠言誤疑良佐之意措辭可也○下備忘記曰追惟已已之事不覺忸怩于中也莫察悃悃摘抉語言誤疑良佐遂至於息禮表而幽鬱莫伸予嘗平心徐究恍然覺悟大加悔恨寤寐輾轉積有年矣矣但今日而已哉然則今茲渙發綸音重正壹位寔出於復天理之公而賴宗社之默佑也宜命詞臣前頭頒教文中以此意明白措辭

○五月吏曹判書柳尚運侍 上言人君有過舉為臣子者陳疏力爭固其職耳不必以此褒贈而具斗寅朴泰輔不幸先死不得與觀今日之慶若有隱卒之典則有光聖德上曰兩臣忠節可比於孔道輔既許復官旌閭鄉言如此其贈吳斗寅議政朴泰輔正卿○閏月前郡守宋基泰上疏進其父時烈遺疏及 孝廟御札三幅 上荅曰所進三幅御札雙手擎讀不覺涕泗之沾襟而至若聖祖密勿之宏規遠謨度越千古其在予繼

述之心欽玩莊誦感愴架增當付諸秉筆之
臣記載汗青昭示萬禩而亦使有節略處一
款當與大臣議處獨對時說話之密錄於冊
子者想必箴置矣亦宜投進而仍省附陳先
卿三度疏章其所以闡揚 聖祖之至德畢
義效忠至死彌篤之誠炳炳凜凜可質神明
而著署之手迹宛然依依若在世而封章者
予執書盡傷益切悔恨之心也噫先卿實無
負於予而予獨負先卿悠悠九地孰知我悲
仍念宵人之戕賢毒正何代無之而未有如

已巳之慘刻者邪正之分於是立判而義易
所謂開國承家小人勿用之說詎不信哉茲
用悉敷心腹以示至意焉○御書講李彥綱
言近有量減大同之令是田役也身役亦宜
視此量減 上命廟堂議之後南九萬白
上曰民之最難堪者在身役請入除一死而
當納一疋半者除其半 上可之○六月復
以李珥成渾從享于文廟先期賜祭于其家
仍宣教文諸道鄉校使巡察使造位版以頒
推擇言日舉行盖用壬戌陞配時舊例也是

日百官陳賀頌教中外○秋九月副司直金世翊試士嶺南而歸疏論本道諸官格外折受及河陽民田事 上荅以戊辰受教定以職田勢所難行而格外折受並禁之河陽之田還賜民人○冬十月御書講侍讀官李健命言畿民困於郡縣除役之弊蓋田稅大同之外出薪芻雉雞冰以供之例也其以油蜜紙魚代之者曰除役除役稍便故吏民互為利不除役者為最困宜禁之 上命廟堂稟處遂罷之○上下備忘記曰藐予小子叨承

祖宗之不緒臨乎兆民之上者二十年于茲恐墜付畀之重夙夜祗慄罔敢或忽而只緣無德政多乖舛以言乎朝著則忠邪莫辨翻覆相仍今雖悔悟化理更張而委靡之勢日甚一日若何以挽回耶以言乎生民則軫恤之意非不切矣澤不下究怨咨朋興瓦解之形迫在朝夕若何以拯救耶嗚呼國計民虞到此地頭譬如大病之人氣血耗竭俞扁之技亦末如之何乃者時候失常雷電之變頻作於純陰閉藏之月而燁燁競競不寧不令

嗚呼天之降灾祥各以類應作善降之百祥
作不善降之百殃人事之失於下而謫見於
上然則今日台灾豈無所以或者對越有所
未至而怠勝敬歟此心有所係着而私勝公
歟骯骯成風而狂戇之論莫聞歟野有遺賢
而緇衣之誠未篤歟俗多侈靡而傷財者衆
歟刑獄多滯而抱冤者多歟是何皇天之疾
威至此乎嗚呼君之事天猶子之事父父之
容色少有不豫為人子者但當咎責之不暇
自古人主遇灾而戒慎則安輕忽則危敬肆

之間吉凶立判予當益思盡修省之方而其
可無求助勗勵之道乎承肯代予草教宜自
政府廣求直言君德之闕遺朝政之得失生
民之利病悉陳無隱言雖不中予不罪焉嗚
呼咨爾大小臣僚自乃祖乃父世篤忠貞遭
茲岌岌之秋勿謂不足與有為而棄予必須
乃心王室奉法率職少答天譴政院請以
上旨布告中外再啓始允之○十一月掌令
金灝上疏陳戒 上批曰耽玩留批之說雖
不諒予心而忠愛陳戒無媿古人看來嘉歎

可不體念予既悟其失而納讜言矣君臣之間貴在誠信寧容假飾如欲臨觀則何必建屋而後為之哉從前親臨泮宮輦過茲路自內時或出御以瞻羽旄之美而地勢淺露太無內外之別頃年構成數間實為是而非遊賞也長時封鎖耳目所及非可誣也仍下虎皮賜之曰表予嘉尚之意○十二月戶曹判書李世華請對言咸鏡道年飢特甚人麥牛黃應納價布田稅米布及軍民役布差等蠲之以慰羣情諸道各被蠲役之惠而惟都民

獨不與焉今年截冰所出之米宜除之上並許之○下備忘記曰一道之內方伯閩帥各有攸職設官之意實非偶然而惟此江原一道獨無制閩之任揆以軍政殊涉踈虞兵使則雖不可猝然初設春川防禦使勿以文武交差每遣從二品武臣而必擇聲望表著可為閩帥者畀之留意戎政事下兵曹

國朝寶鑑卷之四十九

國朝寶鑑卷之五十

肅宗朝十

乙亥二十一年春三月下備忘記曰予於燕閒之時未嘗不親近書籍曾讀宋史至岳武穆之事不覺曠世相感千載起敬也噫當夷虜猖獗乘輿北徙之日慨然以一雪國恥恢復帝業為己任力排和議奮忠破賊兩宮之還指日可期而克賊誤國忠臣陷於毒手五國空照寒月此千秋烈士之扼腕慷慨處而况其四字之分明沮背婦人之抱瓶投井莫非

天性之自然忠孝之所感可謂凜凜若白日
秋霜也予意欲以此人特為合享於永柔諸
葛武侯之廟以樹百代之風聲其令禮官稟
旨舉行○夏四月 上命掖庭僕隸牽入一
素駝於宮中承旨朴世燬李壘等以不育奇
獸之義論奏陳戒 上荅曰買來之官奴已
自該宮治罪而使之輒為牽來者不過一見
其物象而已有何留畜之意哉今觀啓辭出
於愛君之誠予甚嘉尚即令留門出送焉○
秋七月引見大臣備局諸宰左議政柳尚運

陳宮家折受事曰每宮二百結折受乃是定
式而今則過於定限者甚多若於二百結定
限之外盡為革罷自朝家量給米布銀貨使
該宮自備庄土得以成掾則好矣又曰庄土
未備之前限年賜以公賦稅則公私俱便矣
壽進明禮於義龍洞則事體異於他宮事曾
有別判付矣此四宮及明善明惠兩房則以
戊辰年為限戊辰以前折受處則仍存以後
折受則盡為革罷似好矣 上皆從之仍曰
此後永勿折受可也○九月 上下備忘記

于政院曰大病之餘少有思索輒必氣升而此則關係民事不容少緩故書下備忘記即速下諭其文曰嗚呼惟予小子以無才無德臨乎爾等之上于今二十一年矣以一身之眇然作萬民之父母莫敢違寧早夜以思者一則安民二則保民而祗緣明不足以燭理政不知其要領懷保之策日講於細氈之上而惠澤闕而不行愁歎之聲日起於蔀屋之下而倒懸莫之能解噫爾等之困窮若此則視聽自我民之天安得不赫然威怒荐降饑

饑乎嗚呼邇來十數年之間使爾等無一日奠居之樂有連歲殿屎之苦者究厥所以職由於不能盡君師之責寔予之過也常有愧赧若隕淵谷嗚呼今日之事尚忍言哉皇天降割灾害並臻百穀不成八路同然狀聞隨續罔非驚心正當收稼之節流丐載路景象遑遑則不待來春靡有孑遺之慘將復見矣茲實關存亡之機敢曰流行之灾耶嗚呼爾等無罪無辜生此不辰酷罹荼毒天乎天乎胡寧忍斯臨餐嗚咽撫枕長吁寧丁我躬尚

國朝寶鑑卷之五十一
三十一
寐無咄也嗚呼昔當庚辛之灾荒使環東土
數千里之生靈得免盡劉之慘者實賴我
先王至誠拯救之澤嗚呼我先王至仁厚
德之入人者可謂至深矣嗚呼爾等乃祖
宗之赤子則縱予不穀豈忍忘先王之遺
澤而棄予流散乎嗚呼事已至此無可奈何
予方與廟堂諸臣晝夜思度一面減削其御
供一面節省其浮費以為竭力濟活之計切
願爾等之忍飢忍寒各保妻子毋或離散毋
或竊盜也予豈食言者哉嗚呼予非爾等之

父母爾等非予之赤子乎父母之於子或有
疾痛痾癢扶護之方靡不用極者至情所在
自有不期然而然矣今日寡昧之於爾等愛
欲其生之心亦何異於此哉嗚呼一紙播告
亶出悃悞爾等庶幾哀予而動聽也卿其須
以此備忘記明白頒布于民間俾知予哀痛
惻怛之意仍念連年設賑中外積儲曩恥之
餘遭此振古所無之凶歉移民移粟茫然無
計嗚呼若何而善為調賑民無捐瘠耶日夜
焦心罔知攸措咨爾方伯體寡昧宵旰之憂

效先賢浙東之政夙夜匪懈一意賑事苟有
利於赤子勿憚頻繁劃即條奏毋貽後時之
歎又必申飭列邑察其勤慢嚴其黜陟使荒
政無一毫未盡使吾民無一人填壑則卿等
亦受其福祿矣且也勸諭蓋歲者必須相出
相資毋或為獨活之計則此亦救民之一助
也至若諸道閫帥各鎮邊將雖無專掌賑政
之事各自有管下之軍卒而軍卒亦一民也
苟不悉心撫摩顛連之患在所必至寧不惕
然矜愍乎卿等並宜着實奉行事下諭于八

道監司兵水使及兩部留守○禮曹請以陳
賀時各道方物物膳依封進例 上以年凶
特命外方物膳停封弓帑筒箇外方物亦勿
封進○上下教曰今年大侵振古所無節屆
收穫已有餓莩則來春填壑之慘不言可想
念及於此不覺心斷也予惟凶歲救急莫如
橡實故曾已留意分付闕內諸處使之着實
拾取而此亦不實所得僅二十斗矣意在救
民則不必拘於多少故特下該廳且諸宮中
除尤甚板蕩者外內需司米一百石木綿八

同布子七同壽進龍洞兩宮正租各一百五十石並下該廳俾補賑資之萬一而其中壽進宮以祭祀宮家遺儲不敷今方拮据追後出給內帑所藏中鹿皮十五張胡椒二十斗丹木三百斤白礬二百斤亦為下該廳知悉舉行○上以饑荒舉動時鼓吹及殿庭軒架永昭殿大祭時軒架並命限明秋陳而不作○冬十月 上下銀子二千兩于賑恤廳使補賑資○十一月御晝講 上曰明火賊承款於捕廳變辭於刑曹者曾命更送捕廳矣

此後則變辭者刑推三次後更送捕廳取服後又送刑曹如是者三度則直為結案正法事分付其中情節不分明者令該曹更為稟處○領議政南九萬言宮家折受革罷後所謂代受者尚存請以各軍門各衙門屯田充給宮家宮家代受之民田則盡為出給宜矣上曰不必充給直為革罷此後勿令代受可也○下備忘記曰予按禮記孟春元日祈穀于上帝農者為國之本而孟春一歲之首則是月上辛祈穀者豈偶然哉噫今年八路之

大侵實是前史所罕賑穀難聚餓莩相續而予之所大懼者正在嗣歲以稽事之豐凶環東土億萬生靈之死生判焉赤子靡有孑遺國家安得獨存此予之所以倣古制而為生民欲躬詣社稷虔誠祈穀者也其令禮官議于大臣舉行○命賜領敦寧尹趾完柴炭教曰遣人存問則位至三事無異寒士真可謂宰相也輸送柴炭以表至意○上下御札於領敦寧尹趾完勉諭造朝之意手書略曰大臣之久離京輦在治泰尚云不可矧茲國計

民憂已到百尺竿頭之日乎卿之沈凝之量敦確之操終必有賴於末路頽俗此予之所以欲致之而後已者也茲以手書丁寧申誥卿其體諒安心偕來○十二月遣禮官致祭宣額于故判書吳斗寅故應教朴泰輔之祠○上親製咸興永興兩本宮 神德王后退紉祭文以送教曰咸興永興兩本宮祭祀會前則以別差次知舉行而無祭文矣今此神德王后退紉之禮既因外朝陳達舉行且令本道監司題主則事體之重大與前自別

今此兩宮祭文親製以送出於重事體之意也祭物令別差依前設行而獻官則以本道監司差定諸執事以本官及參奉差定事言于該曹

丙子

二十二年春正月

上下備忘記特諭于

八道監司曰獻歲發春草木皆欣欣有生意而哀我無罪無辜之億萬生靈獨罹此罔極之饑饉仇離道殣之慘在秋冬而已多矧今日氣象之岌岌尤如何哉今日即是丙子也追惟往事念彼民事殆有甚焉噫干戈搶攘

危莫大矣而猶有避禍全軀之地而今則八路大侵以穀為名者無數畝之成實以食為天者無卒歲之糊口雖欲行乞而亦不可得則赤子之陷於危亡莫今日若也噫君之於民猶父之於子也子有疾痛醫治之道宜無所不用其極如或宜施而不施有一毫未盡則其為悔恨當復如何哉今日國儲可謂哀痛中外蕩然無可着手處縱欲大段施惠其道無由也然而君臣上下晝思夜度一以救民為主一政一令之利於民者劃即奏達毋

國朝實錄卷之五十一
致闕漏外而監司守令正當開賑之時必體
予前秋播告之旨以民飢與同飢為心反復
料量另加賑賑切勿以飢民口吻中一合之
米為奸吏潤索之資也以一道赤子之生死
付之於卿等其責任之重為如何苟不以至
誠無以救涸轍而副予意也彼至愚而神者
豈不知誠與不誠乎守令中別有無狀底人
憑藉財利立視民死者予則孛戮斷不饒貸
噫比來竊發無處無之行旅幾乎斷絕此雖
由於人心之不淑亦未必非飢寒切身之致

正所謂得其情而哀矜者也在上之人若能
以德教化民使民雖窮而不忍為至不善之
事則寧有今日之患耶是予所以中夜痛歎
者也咨爾方伯明聽申誥毋敢或忽而至於
止盜之方勿為專尚譏捕必先勞來安集之
政以盡承宣之責少紓宵旰之憂且農者天
下之本也雖在平時猶以勸課為務况於今
日乎東作不遠亦宜申飭列邑禁民逐末皆
使歸農服田力穡俾得有秋豈非所當行者
乎卿其知悉惕念舉行○以辛酉減八路今

年稅豆之半○上謁宗廟永寧殿下教曰太廟奉安冊寶屢經兵燹餘存無多到今追上者不可不趁夏享釐正此意言于主文之臣○下教曰東西色目已是難救之痼弊而士類之中打成一片其為不幸可勝言哉日昨草野之疏以老少所尚各異等語肆然插入有善美語者然告君之辭決不當若是此必未之深思故茲用開示焉○傳曰設粥所頃送別監持來飢民所喫之粥合數頗優米粒

稠厚矣欲觀終始之如何又令持來則非但合數大不及於前米粒亦甚稀淡若此不已殊非設粥本意飢民決無賴此生活之理東西設粥所以此意各別申飭○三月有男子犯夜禁禁衛營邏卒執之貴人金氏之奴力奪而免之至毆傷邏卒禁衛營請逮治其奴上許之○御書講上曰天下事太快則反有病日者筵中私鑄舍置者定律也諸臣所陳多異同而大臣力言當置之死夫以殺人論之必加功然後罪至死私鑄者既以殺死

論而舍之者亦死無乃太重乎且大臣以刑曹刑杖之不嚴欲去拘忌夫禁府刑曹杖法既與鞠廳異刑則豈可一日累刑輕變舊章以開後弊乎予未知其可也○夏四月左議政柳尚運上劄請於大內修改之役十分節損以示不敢豐豫之意荅曰憂愛之誠予甚嘉歎上年秋已曾修理處則勿為磨鍊以示節損之意○秋八月 上謁昌陵親祭兩作上曰雖沾濕衣冠民事却可幸也謁敬陵遣官行祭詣翼陵親祭仍拜順懷世子墓指崗

邊一墓謂左右曰是誰墓也對曰 睿宗大王長子仁城大君墓也 上曰年久荒蕪心甚盡傷遣禮官致祭改莎草○冬十月王堂官李鼎命請吳斗寅朴泰輔妻子給料終身李廷謙仍陳泰輔父世堂尤宜先施周恤上命本道周給○上及中殿世子及嬪宮詣宗廟行展謁禮其儀殿下立位於廟戶外之東西向王世子立位於殿下位之西南北向中宮殿拜位於廟戶外之西東向嬪宮拜位於中宮殿拜位東南北向殿下王世子具翼

善冠袞袍出還宮時鼓吹並陳而不作殿
下王世子改具冕服入就廟庭行四拜禮中
宮殿王世子嬪加首飾具翟衣尚宮前導陞
自西階至立位尚宮導殿下王世子陞自阼
階至立位中宮殿王世子嬪行四拜禮訖尚
宮導殿下王世子入小次尚宮導中宮殿王
世子嬪還就齋殿左右通禮導殿下還齋室
殿下王世子改具翼善冠袞袍還宮○王
世子世子嬪詣永昭殿展謁其儀王世子立
位於殿戶外之東北向嬪宮立位於殿戶外

之西北向王世子具翼善冠袞袍出宮詣
慶德宮入齋室改具冕服入就位行四拜禮
嬪宮加首飾具禮服守閨前引陞自西階至
展謁位守閨導王世子陞自阼階至殿戶外
立位典贊唱四拜嬪宮四拜訖守閨導王世
子還入小次守閨導嬪宮還別殿訖相禮導
王世子還齋殿○十二月 上得王世昌
風圖二幅命吏曹判書崔錫鼎撰詩以進錫
鼎撰二篇仍劄陳行仁政之意以寓勉戒
上優批嘉獎賜鹿皮一張

二十五二十三年春正月引見大臣備局諸臣
上召吏曹判書崔錫鼎進前教以獎用循吏
之意錫鼎陳行仁政之要仍請抄善治守令
陞授州郡允之○下備忘記于咸鏡平安兩
道監司使之救濟民生登聞弊癘又以北道
灾荒孔棘命三名日物膳限明秋停封又下
備忘記諭西北御史使之救濟民生宣布德
意○二月江原監司俞得一陞辭 上引見
諭以盡心賑政勸課農務之意仍命以田野
荒闢為守令之殿最○三月 上幸淑徽公

主家行臨吊禮 上自幕次步進公主几筵
前南面坐主人以下列於庭下四拜訖禮房
承旨金世翊唱引主人上通禮引主人陞自
東階 上西向跪通禮唱哭 上憑几而哭
近侍以下皆助哀通禮唱止哭近侍以下止
哭都承旨金載顯進請止哭良久 上乃止
哭百官奉慰問安後 上命近侍以下皆出
○閏月御晝講是日畢講大學衍義講官陳
是書乃人主龜鑑雖於畢講之後亦宜常加
覽閱 上曰真德秀十年覃思用功甚勤今

見此篇悅如其人之在側其於治道甚切至
當各別留心焉○夏四月 上親禱社壇還
宮之路駕臨義禁府前路駐輦街上召承旨
史官及大臣三司禁府刑曹堂上入侍 上
曰旱灾此酷親自禱雨而微誠未格雨意邈
然言念民事實為罔極應天恤民之道宜無
所不用其極予意禁府典獄時囚罪人中綱
常殺獄強盜外皆欲疏釋之領議政柳尚運
左議政尹趾善曰纔經親禱行過此地駐輦
下詢欲為疏釋實出為民之至意何所不可

持平趙泰老請並釋外方罪囚尚運又請並
釋捕盜廳罪人 上命並放之又命應入歲
抄者皆蕩滌禁府刑曹堂上持囚案奏其罪
目 上命招禁府典獄囚人六十餘名悉詣
駕前諭之曰今此駐輦行赦實出遇灾憂民
不得已之舉非以汝為無罪也汝輩各自警
飭勿復犯罪若或再犯更不汝釋也罪人多
有感泣者 上見罪人蓬頭鬼形蹣跚顛倒
惻然曰天之生民厥初何異而此屬陷罪久
囚皆成鬼形大禹之泣辜信然矣且見此屬

流丐慘然之狀可以推想昔我 宣廟值癸
 甲凶荒除出御供米以賑飢民此實 聖祖
 恤民之盛德豈非今日之可法乎其令該曹
 御供米參酌除出以補粟島粥資非以升斗
 之米謂能普濟欲示予猶已飢之意也副提
 學徐宗泰曰 聖上憫旱憂民之意至此天
 意豈不感動伏願務積誠意毋少間斷宋高
 宗禱雨將出而天大雨時人謂之方寸來雨
 人君誠心對越則感應之理如是矣 上曰
 當體念焉○還宮後下備忘記曰嗚呼天降

喪亂饑饉荐臻道殣相枕慘目傷心父而殺
 子人而食人化為龍蛇在在嘯聚使斯民為
 此至不忍至不善之事可勝痛哉嗚呼予不
 能懷保致此境界一則予咎一則予愆夙夜
 痛歎無樂南面不料亢旱之慘又至於此凄
 風毒霧殆浹三旬大地焦赤萬姓啜泣失今
 不雨人類將盡代犧桑林誠切自焚而微誠
 未格視天夢夢噫倉庫罄而私蓄竭將立視
 其死耶嗚呼昔當癸甲凶荒餓莩日積 宣
 廟至有先死不可得之教今日小子之心

國朝寶鑑卷之五十一
聖祖當日之心也自今避正殿益加寅畏修
省之道政府廣求直言君德闕遺朝政得失
以至調濟之方悉陳無隱苟有利於生民吾
何愛髮膚乎嗚呼二紀臨民不穀無良自速
災沴反躬慚慙夫復何言而但念上下交修
有不可已則豈無一二可言乎今日朝廷可
謂極渙散矣各立門戶習成傾軋人微過
如得竒貨枝節層生疑怒無限一日二日反
覆沈痼一向泄泄甘為亡國大夫其果合於
道理耶咨爾大小臣僚明聽予訓精白乃心

毋曰旱災是適然毋曰黨論不可破式克欽
承少荅天譴至於蕩滌垢瑕疏通滯鬱甄拔
人才慎簡字牧亦有國之急務其令廟堂別
為稟處而減膳禁酒勿擊鼓等事劃即舉行
○御書講 上曰書筵開講之時不但講說
文義而已必以問荅物情艱難辛苦之狀反
覆曉諭使耳聞熟習可也○五月以旱災愈
酷命初六日親禱于南郊以罪已之意措辭
於祭文中又教以太祖高皇帝閱旱憂勤
徒步詣壇降輿之處設於稍遠之地○設壇

祭關西餓死人 上親製賜祭文其文曰噫
予涼德續承丕緒二紀于茲矣政多不善澤
鮮下究自速皇天之憚怒降此頻年之大殺
哀八路之生靈舉相填于溝壑村落蕭條殆
同離亂荒田廢畝滿目傷神而矧乎逃矣西
土抑獨何辜偏罹荼毒首尾六載涸轍之急
南北奚殊嗚呼今之饑饉疫癘維其棘矣念
彼無辜生此不辰父子不相保夫婦不相救
兄弟不相恤而至有人相噉食之變是豈本
性增予悲盡也嗚呼慘矣顛仆於道者莫非

沉丐暴露於野者莫非餓殍孰招汝魂孰尸
汝祀無依無託不其餒而嗚呼西門其虛矣
邦本其蹶矣尚忍言哉嗚呼予非爾等之父
毋爾等非予之赤子乎惟予無良在平日而
既不能推若保之惠困廩空竭當此時而又
不能盡調濟之方使我同胞之民罔極之禍
到此地頭則何異於予殺爾等也嗚呼父母
之懷當復如何心焉若割涕淚河傾嗚呼反
覆思惟一則予罪二則予罪譴罰是甘而吾
民替受其殃悠悠蒼天胡寧忍斯直欲溘然

而不可得也嗚呼天運循環極則必反迺理
之自然庶幾自茲以往多黍多稌少紓倒懸
矣不幸旱魃肆虐彌月愈甚麥既大無禾又
盡槁差過數日靡有孑遺夙宵焦迫不遑寧
慶也嗚呼一婦抱慟三年亢旱况無罪無辜
之相續以亡者不可計數而周知者耶嗚呼
悲呼冤哭結而未散足以傷天地之和則關
西一方殆有甚於諸路也予是庸惻怛爰命
道臣擇地為壇集爾羣靈侑以清酌誥實由
中理應感通嗚呼爾等其携朋挈儔來享我

庶羞以款我至誠解爾煩冤導迎和氣庶疵
癘之永除底國家於泰寧故茲教示想宜知
悉○秋七月下備忘記曰國家不幸饑饉荐
臻八路元元大命近止矧茲西北受害偏酷
而關西抑有甚焉以前後狀聞觀之人民死
亡恰過萬數矣此外落漏者安可勝計耶嗚
呼饑火所迫倫常滅絕而至于人而噉人之
肉可謂極慘毒矣雖兵火之禍何以加此而
求之往牒亦所罕有當此之時予實無樂南
面靡安玉食也昨者監賑御史之回也觀其

書啓聽其面奏令人傷神不覺嗚咽目今賑政雖畢嗣歲之慮想必倍焉而况稽事之更無他灾又未可必者耶然則豈敢以一時罷賑遽弛懷保之心乎必也如慈父之護稚子若大病之善調將然後萬死一生之民庶有蘇息之望而朝家軫恤之澤亦可有始而有終矣宜令廟堂就別單中可以採施者有可行而闕而不載者並加商確稟旨舉行仍念連歲大殺道殣相枕此皆無罪同胞之民也內而有司外而方伯已體朝旨隨即埋置而

安保其無暴露之尸乎昔者文王鑿沼而命葬無主之朽骨文皇散帛而俾收亡卒之遺骸哀此累萬之餓鬼不啻朽骨孔棘之灾荒殆甚金革惻怛之心油然而生合有明勅京外之臣着實掩瘞之舉亦宜知悉用副至意○八月 上以侍講官李寅燁受由往來湖中問農事寅燁俱以所見白之 上軫念民事遇有自四方來者輒延見咨訪如此○冬十一月白虹貫日政院陳啓以戒 上優批仍下備忘記曰朝者書雲觀奏陰虹貫陽之

國朝寶鑑卷之五十一
變蹶然而起仰觀乾象冠履交戟景色甚惡
令人驚怖久而靡定也嗚呼今日是何等時
耶上天俾怒荐降饑饉餓莩相連人類將盡
國之存亡間不容髮鴻鴈之詩未足喻急已
不勝其夙宵憂遑矣非常之灾咎疊見於此
際未知何樣禍機伏於不覩不聞之中而諄
諄警予至再至三哉於此有以見天心仁愛
必欲扶持而全安之也若何以若天心而解
民怨耶思之至此丙枕何安嗚呼變不虛生
必有所召則今茲致異亶由一人德涼政厖

益切危懍罔知攸措也承旨代予草教宜自
政府廣求直言以匡不逮言雖不中予豈加
罪嗚呼朝廷者四方之根本而不幸論議橫
潰門戶各立互相攻擊殆無寧日奚暇專心
國事同舟共濟乎若不痛革此習末流之害
必至於亡人國而後已可不懼哉咨爾大小
臣僚體交修之至意念國勢之泮渙克祛私
黨奉法率職俾有實效毋歸空言

文宣 二十四年春正月備忘記曰予以寡德纘
承丕業夙夜祗畏罔敢暇逸勵精思理志非

不切而仁不被物政多紕繆姑舉其大者而
言之則賦稅之不均由經界之不正也白骨
之徵布由身役之偏重也黃口之編伍由軍
制之漸廢也守宰慎簡而貪暴居多割剥是
事而膏血殆竭痼弊予所知而不知其善變
汚吏予所憎而無一人抵法民之困苦莫此
時若也人怨登聞于上天災乃降于下旱澇
風霜饑饉荐至恒暘於南訛之節肅殺於流
火之月三年大侵灾出一套敢曰流行亶係
存亡嗚呼矧茲畿甸湖西實我國家根本而

遭害愈酷蕩無農收豈非天戒孔昭深警予
衷也耶俯仰跼蹐憂慚何極嗚呼言念今日
之國事可謂痛哭之不足也積為飢火之所
惱拮据棄糞之良心骨肉相棄屠鬻相食道
路乞丐殞斃繼續鄉廬空虛烟火斷絕正當
陽春布和萬物暢茂而不惟賑恤茫無計策
種糧俱乏農耕不興苟或東作又失其期將
若之何哉嗚呼匹夫匹婦之不被其澤若已
推而納之溝中則况萬姓之顛頷垂死不啻
匹夫匹婦之不獲寡昧之痛切心骨又不啻

推納溝中也愛欲其生乃父母之至情八路
仰哺似赤子之帝饑而財穀殫盡不能普濟
惟畿暨湖切欲專意而空言無補實惠未究
是並與畿湖之民而棄之也豈王政之所忍
為者乎嗚呼致咎之本職由一人上帝降格
寧丁我躬哀此元元何罪何辜事已至此無
可奈何然而濟人之急奚待盈豐予已與廟
堂之臣反覆商確略有區畫爾等須勿以予
言為不可信也嗚呼予雖無良作爾等之父
母惟我 祖宗之至仁厚德浹爾等之肌髓

胡忍忘 祖宗之遺澤棄父母而去乎嗚呼
連年設賑私蓄亦罄而予大夫如能體朝廷
之德意以獨活而為恥矧恤窮餓全活衆多
則褒賞之典予豈吝惜哉嗚呼以萬民之命
付旬宣之臣卿其極慮與我同憂招集父老
諄諄布告申飭列邑孜孜賑政或以便宜或
以狀聞稍有涉於利民則勿憚於頻煩至若
勸課農耕另加着意畢竟戶口無損田疇不
荒者宜居第一別為具奏嗚呼一紙丁寧言
非騰口必精必詳用副予意事下諭于京畿

國朝實錄卷之五十一
二二二
監司仍念前此凶歉不如近歲一視同仁推
廣惠澤而獨於今日有著秦越者此豈厚薄
於同胞之民而然哉蓋緣事力之不逮而其
失如保赤子之道則大矣罔非予咎也關西
一方首尾六年災害之作愈往愈甚至於清
北五六邑一望蒿蓬便作空虛兵燹之禍未
足以喻其慘也即今歲事已新賑饑勸農在
所當先亦為下諭于諸道方伯及留守○備
忘記噫國家不幸東西標榜邇來百年輾轉
沈痼可勝歎哉然而自其在在上者一視之道

觀之則莫非王臣譬如父母之於諸子本無
愛憎之別也况我國偏小門閥是尚用人之
路已患不廣而朝廷之上進一退半國之
人又多滯鬱此弊不除何以為國推究其源
實予不能以大公至正建極于上有以致之
我責我躬心焉慚恧在下之人亦豈無不違
處乎銓曹採公議收錄而或托疾不來或乍
進乍退全無誠實底意如李湜睦林重之事
是已向所謂不違者此也噫目今迫切之憂
莫如民事而朝廷即四方之標準則鎮定保

國朝寶鑑卷之五十一
合獨非急務耶嗚呼陽春載回和氣藹然與
時俱新寧不在今其令銓衡之臣除關係名
義者外略其過而用之有其才則舉之以盡
蕩平之道惟爾諸臣澡心易慮毋如前日之
為用勉共濟之圖而至於是非所在不可不
一定而不撓如有誣詆兩賢伸救凶黯者則
投畀有北以嚴懲惡焉○備忘記我國之制
晉接輔相與樞密之臣一月之內只是三次
雖在平時固已稀濶而况民憂國計到此地
頭之日乎從今賓廳之會更定其式每月以

初五初十十五二十二二十五三十日為日次
而六次之中三次則原任大臣亦令入參以
為聚精會神共做國事之地○備忘記人主
作萬民之父母一人之饑猶已之饑一人之
寒猶已之寒也矧今餓殍日積於市而莫之
救曷堪痛傷連觀京兆之啓五日之內僵屍
之填壑者計以四五十數通一月計死者幾
許噫雨露之惠枯葉均霑王者之澤禽獸亦
及則惟彼流丐於道路者雖非土著之農民
以枯葉禽獸亦及惠澤之義推之則豈忍立

視而已耶其令賑廳時加濟恤更飭諸部著實埋瘞用示予惻怛之意○領府事南九萬上疏引年請退荅曰禮記有不得謝之語此君不許其致事之謂也禮經之意若是著明予之倚重不啻柱石則許其謝事萬無此理○二月引見大臣備局諸臣上盛言近來士大夫被惑於風水之說遷葬者相繼其弊不貲特命嚴禁戶曹判書李濡言雖是禮葬之喪隨其遷葬時輒施恩典非矯弊之意上命自今遷葬時勿許禮葬○上曰孟子曰

國家閒暇及是時明其政刑目今饑饉荐臻國家艱虞而幸而時無別警宜及此時有別操振作之道我國民役苦重軍政甚踈黃口之編伍白骨之徵布尤為可矜此等弊端必須於大頭腦處從容講究量宜變通後庶可有實效矣諸臣各陳所見上曰此非立談間可定之事須相與反覆商確必以痛革為心可也○冬十月上親製祭文遣重臣行厲祭于南郊祭文曰噫予不穀纘承丕基德涼政厖獲戾神祇饑饉薦酷四歲于茲子遺

黎氓毒癘又罹自春徂冬日熾月滋靡村不
及無地可移積屍相枕八路京師蓄異之慘
古來亦稀我為民主國以民依一人有罪萬
姓阡危夙夜遑遑莫救燃眉寧丁我躬尚寐
無知仰惟明神衛我邦畿功利斯博民以賴
之心切恤患匪神伊誰爰遣重臣薦誠陳辭
祀事孔明是享是宜感則必通陰騭亟垂○
因前縣監申奎之疏命會宗親文武百官于
大庭以魯山慎妃追復位號事問議 上遂
下備忘于賓廳曰予竊惟 光廟受禪之初

尊奉魯山為太上王矣又命月三行起居之
禮矣不幸末梢處分恐非 光廟之本意而
究其源則由於六臣也六臣既褒其忠節則
於其故主之追復位號未知其更有嫌碍而
皇明景泰之事雖不相類亦可做而行之矣
予以為今茲追復益有光於 光廟之盛德
也噫日者申奎之疏展讀未半傷感之懷自
切于中而未嘗以輕論重事有一毫不平底
意思此所以先詢於筵席者也嗚呼神道人
情不甚相遠無乃 祖宗在天之靈悅豫於

冥冥之中而有此相感之理耶以踈遯之臣
論至大之舉可謂千載一時而事竟不行則
更待何日乎噫天王家處事自與匹夫不同
是以或夫揮乾斷不拘拘於論議者自古有
之矣事苟可行何必持疑其令禮官亟舉縉
儀至若慎妃之事今之議者多以追復為不
合於禮而引古語為喻是固然矣貞昭二陵
追復曲折之與此差異予亦知矣躋祔太廟
位居 章敬王后之右是又難便之一端矣
如沈温之故事 中廟非不洞知而一再啓即

允先正之疏可謂復位之善機會而伊時下
政院之教未有開納之意抑未知別有不可
復之事勢耶仍記昔宋郭皇后廢為淨妃越
明年遣使存問頗示悔恨又明年追復后號
以禮歛葬而然其廢其復皆係仁宗朝事向
太后以哲宗平日悔悟之意特復廢后孟氏
之位而今日之事大有所不然天意所在未
敢忤度而強躋清廟於殆近二百年之後者
果何所據耶頃見百僚之議或以魯山之事
尤為難處而以予言之其所以難處者恐在

此而不在彼也反復以思終涉重難未知何以則能不悖於禮而合於稍加尊奉之道少慰抑鬱之人心耶咨爾大臣六卿判尹三司宜各陳所蘊諸臣各以所見獻議 上曰聖祖當日之意雖不敢忖度猝然追復實涉重難而只就 先朝已行之事而行之則殊無追加尊奉之意依順懷昭顯廟例內官守直太常備送祭需無祝行祭似不至於難便而亦可為稍加儀節之道矣右議政李世白亦以為宜 上命依此舉行後領議政柳尚

運又言慎家所奉神主以廢妃慎氏為題廢字已不可仍存而若去廢字則妃字亦不可書今過百年之後改題亦難且節目間事亦與順懷廟有間宜有減數之道世白以為題主則仍其舊題以存據實直書之意不害義起儀文則就順懷昭顯兩廟之制而可用者用之可損者損之恐合事宜判府事崔錫鼎以為題主以潛邸時名號某郡府夫人書之儀文比兩廟降殺為當 上命依領右相議施行後禮曹就議廟堂令守僕守直○引見

大臣備局諸臣時將舉魯山大君復位儀節
領議政柳尚運陳稟京則以復位祔廟為彌
外則以封陵為彌各差都監提調禮曹判書
崔奎瑞又陳各陵象設繁簡不同之狀請遵
用故例 上以厚陵石物最簡且小令依此
例為之此後仍著為定式後因崔錫鼎所達
又依貞陵敬陵例不設武石奎瑞又言前頭
當有祔廟之節而新祔主即已祧之位似當
直入永寧殿而係是變禮宜預先講定柳尚
運李世白皆言當直躋永寧殿奎瑞又言魯

山大君及夫人神主今方奉安於故叅判鄭
重徽家以重徽名旁題云以 神德王后祔
廟時事觀之題主處未有憑據羣議不一未
乃定行於幄殿矣喪禮題主必於魂帛所在
處其義可謂精微今此神主雖是私家所奉
既是神道百年憑依之所前頭題主時似當
就此家行之而題主決不可就行於私家似
當移奉以綏題主尚運言 神德王后祔廟
時因先正臣宋浚吉收議以景福堂為后平
日所居處之地設幄殿而題主矣今則神主

之不可仍奉私家誠如禮官言就淨潔處移奉題主後仍為埋安似合處變之道上命並問議于大臣儒臣皆以領相言為是領府事南九萬於新祔主事曰太廟所奉太祖太宗世宗之位於新祔主皆是祖宗也雖曰當祧之主過祖宗所奉之廟門而不行朝謁之禮直隳於永寧殿豈不未安乎若欲朝謁於太廟則自世祖以下八位皆當奉降於階下列于新祔之下此等變節苟非深明禮意者誠難容易為說及至永寧殿也新

祔主亦當先行朝謁之禮雖均是祧主位次在於新祔主之下則亦當奉降于階下此皆無於禮之禮云後日上又以魯山既復名號而神主不宜久奉私家為教筵臣或言既以臣子之名為傍題不可移奉殿閣上以所重有在不必拘此小節為教尚運又以為遜位以前在於景福宮遜位以後在於昌慶宮請定於此兩宮中上以景福宮無家舍命定於昌慶宮時敏堂後又以南九萬收議中祔謁禮事下詢曰神德王后祔廟時因

宋浚吉收議不行祔廟禮此事何如尚運曰
領府事疏中奉降之說實是深思禮意之言
也但伏聞 莊烈王后祔廟時在下神主無
奉降之節今則只當以從先祖之意行之且
宗廟新祔之主入於廟門而亦無朝謁永寧
殿之禮則今以過神門之故而行朝謁禮於
太廟係是莫重禮節不敢臆斷以對 上曰
宗廟既已先告事由則雖不行祔謁禮似無
所妨而 神德王后祔廟時因宋浚吉收議
不行祔廟禮今永寧殿亦依此例不行祔謁

禮乎尚運曰其時宋浚吉以 神德王后之
於 太祖大王為齊體不行祔廟禮而今則
異於是既是 祖宗之位宜有祔謁之禮矣
上曰永寧殿行祔謁禮而奉降一節不行過
謁一節更為問議可也南九萬又以為今者
端宗大王初膺追復位雖當祧主實新祔輦
過太廟神門之前而不為之一入朝謁遷迤
徑行即安于祧廟則默想神意不致有歉然
者乎深惟我 祖宗之意如以後孫之在鬱
而得伸為悅則無或以不得一相接過去亦

為之缺然乎且聞古禮五廟七廟各有其宮
故凡有事於廟中未嘗有相壓相妨之嫌降
以後也皆用一廟中以西為上之制而新祔
例於先祔為子孫然則新祔之朝謁初無奉
降之禮固其宜也其或新祔尊而先祔卑則
其尊卑之間截然有君臣之分父子之等矣
尊者行禮於楹外之階卑者高處於榻上之
室只隔以簾帳晏然而自如者實恐非人情
之所安故臣於前者獻議敢有所云云雖然
朝廷之禮類以已行之前例為據廣詢之後

則惟在 聖明用中而酌處崔錫鼎以為祔
廟之禮本自朝祖演出而禮適士有二廟則
先朝于禰以適祖廟見於儀禮經傳今此隋
祔時並謁於太廟與祧殿可以推此而知至
於廟庭升降之禮節神道異於人事何可一
一象生此一節恐難行前例有無非所可論
云 上命行太廟祔謁禮後奎瑞言行祔謁
禮於庭下則 列聖在下之位終有所踧踖
不安此先正臣宋浚吉之所以陳疏於已酉
祔謁之時者也且不祔太廟而稱以祔謁亦

不可事勢終有所難便矣應教金鎮圭又言永寧殿則當為追祔宜行此禮而已祧之主元無入廟之禮至於過謁既非古禮尤無可據之文遣大臣只為告由似宜上曰祧主親盡已久不祔太廟直隳永寧殿既異常禮情且缺然予意必欲行之矣戶曹判書閔鎮長曰若以祔謁二字為未安則古有廟見之文以廟謁為稱似好尚運言如以過廟不謁為未安而必欲行之則世宗大王以上龕室啓其前門以下諸室則勿啓而以廟謁為

臚唱恐或得宜矣上可之仍下教于政院曰昔在祖宗朝凡題主或改題時必親臨觀寫豈不以其在幽明情禮如是而後可無未盡耶今番題主時當親臨奉題奎瑞又言神德王后祔廟時曾有謚號只上徽號故不用謚冊而只用玉冊今則世祖所上尊號既已讓而不受當以追上之意製進玉冊文而謚號今始追上則謚冊為重玉冊為次宗廟諸位亦多無玉冊處謚冊玉冊似不必並用上命只用謚冊尚運又以為誌石例為

埋安於退壙與長明燈之間而封陵至近之地以此動役為未安 上命勿用誌石○十一月命大臣六卿政府西壁館閣堂上會賓廳追上 魯山大君謚號曰純定安莊景順大王中正精粹曰純大慮慈仁曰定好和爭曰安履正志和曰莊由義而濟曰景慈和徧昭曰順廟號曰端宗守禮執義曰端陵號曰莊陵 夫人謚號曰定順純行不爽曰定比和于理曰順徽號曰端良齊敬守禮執義曰端中心敬事曰良執心克莊曰齊夙夜敬

戒曰敬陵號曰思陵初領議政柳尚運白上曰 魯山大君尊號恭懿溫文夫人尊號懿德即 世祖大王所上而 魯山讓而不受矣今當上謚仍以此為謚號乎抑別為加上謚號乎 上曰若書 世祖大王所上尊號則可以表揚 世祖尊奉之義意而謚號亦不可不上先書平日尊號復書即今所上謚號可也後尚運又言尊號謚號之並書固知聖意之有在而尊號平日所上者也謚號大行後所上者也題主則固當並書而冊寶

事體有別不必並書仍令諸大臣獻議皆無異辭 上乃可之○移奉 端宗大王定順王后神位于昌慶宮時敏堂都監都提調以下及承旨史官兵曹都摠府堂上郎廳各一員陪從○玉堂請對入侍時 上曰古之人君修舉闕典或出於好名或出於誠心予之追復 端宗大王位號者實出誠心非一時取名之意也予嘗考見當時事蹟心有所不忍忘者而曾因陵幸過六臣墓排羣議復官爵今者申奎之疏正合予意斷行曠典獲遂

至誠故賜海昌尉書曰自今以後庶無遺恨云云此可見予之本心陵寢重役決不可退行也○備局引見時 上曰君之於臣可謂至嚴而設令隨罪罪之事過後不復蘊蓄況同朝之間乎崔判府事之既罪旋叙可見予不為留蓄之意而金德基又為已甚之論此實末世弊風也 上又曰 仁祖朝李貴論罪之啓至以臬示為請而措語極簡約今則雖罷職之啓張皇論列辭語過重至於監司教書即王言代撰而專事浮張繁雜莫甚申

國朝寶鑑卷之五十一
三十一
飭可也○引見大臣備局諸臣封陵都提調
崔錫鼎白 上曰思陵陵內鄭家諸塚已過
累百年依貞陵內舊塚不為掘移之例特許
仍存恐無所妨 上問于大臣而許之仍又
下教曰聞莊陵內有六臣祠宇並為仍存勿
移似宜矣領議政柳尚運曰祠宇異於塚墓
似不當仍存矣 上曰杜甫詩云一體君臣
祭祀同以武侯廟在於昭烈廟近處故也以
此推之六臣祠宇之仍存亦何妨耶尚運曰
昭烈廟未知初在何代而在漢時必不別建

於白帝城似是後人所初也若然則恐非今
日之所可為證且春秋士子聚會行祀於丁
字閣至近處亦似未安 上曰杜甫詩云崩
年亦在永安宮永安宮似在武侯廟近處也
仍令諸臣各陳所見崔錫鼎徐宗泰李寅煥
趙相愚金字抗皆以仍存為宜閔鎮長崔奎
瑞金鎮圭金時傑皆言可移奎瑞則曰祧遷
園陵只行寒食之薦而六臣祠宇當有春秋
芬苾之享此亦大段妨碍 上曰以園陵嚴
敬之道言之固為未安而神理人情不甚相

遠見狀啓即思杜甫之詩矣移建未知其可也錫鼎又引皇明時功臣陪葬之例以證之後因右議政李世白所達移建於龍虎內閒曠處○十二月禮曹因端宗大王復位之慶請頒教陳賀上可之仍命親臨題主翌朝親行告祭陪詣太廟行躋祔禮○端宗大王謚冊草本中頭辭都監以孝曾孫嗣王臣書填禮曹啓言四祖及明宗室書以孝曾孫嗣王臣定宗文宗睿宗三室則只書嗣王臣德宗室則書以國王臣而並無孝

曾孫三字仁宗室則書以孝曾姪孫嗣王臣矣今若依謚冊所書則與定宗文宗睿宗諸室有所異同事涉未安請問議大臣李世白以為十室祝辭之有異似有微意似當以文宗室為準崔錫鼎以為祧遷三宗室只書嗣王臣意實有在仁宗室稱孝曾姪孫似因仁祖朝所稱而承沿不改此則恐不當援以為例今此頭辭所稱既非深考而講定則依三宗室例只稱嗣王臣恐為合宜上命依議○大司諫金字杭以癘氣

熾盛請停祔禮時親臨之舉 上答曰噫今
茲禩儀追舉二百年之曠典則是何等莫大
之禮乎以堂堂千乘之尊拘於癘氣不敢出
闕門一步地者寧有是理耶予性不畏癘近
日守宰之奔避山谷者心常笑之豈可以此
為畏廢應行之禮乎予志牢定已久大臣雖
力爭烏能奪予之志哉此其道理則然非出
於好勝也

國朝寶鑑卷之五十

